

摘藻堂四庫全書薈要

史部

欽定四庫全書薈要

史部

御批通鑑綱目前編卷十八

詳校官編修臣汪鏞




欽定四庫全書薈要卷七千三百二

史部

御批資治通鑑綱目前編卷十八

周敬王三十有九年魯人獲麟

左氏曰西狩於大野叔孫氏之車子鉏商獲麟以為不祥以賜虞人仲尼觀之曰麟也然後取之○公羊氏曰

麟者仁獸也有王者則至無王者則不至有以告者曰有麕而角者孔子曰孰為來哉孰為來哉反袂拭面涕沾袍曰吾道窮矣

孔子作春秋

史記世家曰孔子因史記作春秋上至隱公下訖哀公十四年十二公○杜氏曰春秋者魯史記之名周之舊典禮經也周德既衰官失其守上之人不能使春秋昭明赴告策書諸所注記多違舊章仲尼因魯史策書成文考其真偽而志其典禮上以遵周公之遺制下以明將來之法其教之所存文之所害則刊而正之以示勸戒其餘則皆即用舊史不必改也據公羊經止獲麟麟

鳳五靈王者之嘉瑞也今麟出非其時虛其應而失其  
歸此聖人所為感也絕筆於獲麟之一句者所感而起  
固所以為終也○孟子曰世衰道微邪說暴行有作臣  
弑其君者有之子弑其父者有之孔子懼作春秋春秋  
天子之事也故孔子曰知我者其惟春秋乎罪我者其  
惟春秋乎昔者禹抑洪水而天下平周公兼夷狄驅猛  
獸而百姓寧孔子成春秋而亂臣賊子懼○史記曰聞  
之董生撥亂世反之正莫近於春秋春秋之中弑君三

十六亡國五十二諸侯奔走不得保其社稷者不可勝數察其所以皆失其本已故易曰差之毫釐繆以千里故臣弑君子弑父非一旦一夕之故其漸久矣有國者不可以不知春秋前有讒而不見後有賊而不知為人臣者不可以不知春秋守經事而不知其宜遭變事而不知其權為人君父而不通春秋之義則必蒙首惡之名為人臣子而不通春秋之義則必陷篡弑誅死之罪其實皆以為善為之而不知其義○周子曰春秋正王

道明大法也孔子為後世王者而修也亂臣賊子誅死  
於前所以懼生者於後也○程子曰天之生民必有出  
類之才起而君長之治之而爭奪息道之而生養遂教  
之而倫理明然後人道立天道成地道平二帝而上聖  
賢世出隨時有作順乎風氣之宜不先天以開人各因  
時而立政暨乎三王迭興三重既備子丑寅之建正忠  
質文之更尚人道備矣天運周矣夫子當周之末世以  
聖人不復作也順天應時之治不復有也於是作春秋

為百王不易之大法所謂考諸三王而不謬建諸天地而不悖質諸鬼神而無疑百世以俟聖人而不惑者也先儒之傳曰游夏不能贊一辭辭不待贊也言不能與於斯耳斯道也惟顏子當聞之矣行夏之時乘殷之輅服周之冕樂則韶舞此其準的也後世以史視春秋謂褒善貶惡而已至於經世之大法則不知也春秋大義數十其義雖大炳如日星乃易見也惟其微辭隱義時措從宜者為難知也或抑或縱或與或奪或進或退或



微或顯而得乎義理之安文質之中寬猛之宜是非之  
公乃制事之權衡揆道之模範也夫觀百物然後識化  
工之神聚衆材然後知作室之用於一事一義而欲窺  
聖人之用心非上智不能也故學春秋者必優游涵泳  
默識心通然後能造其微也後王知春秋之義則雖德  
非禹湯尚可以法三代之治矣

履祥按春秋之書夫子之所寓意非夫子之有意也  
太史公有意妄慕孔子上自五帝迄于麟止作為史  
記猶網羅遺聞求十二諸侯譜以盡諸國世家始末  
使夫子而有意於褒貶天下之諸侯大夫以成天下

之書則必訪周室外史之藏論史記舊聞總諸國是非之故不使其有所遺佚止於一國之史也今乃不然獨因魯史修之蓋夫子因見魯史書法非舊是非失真舉其大者就加筆削其他比事而書國史之常必不盡改而舊史之外亦無增加至於襄昭而後國史未盡出或事所未審或人已共知如楚子麇辛之類不待刪削固不盡改也杜氏所謂上之人不能使春秋昭明記註多違舊章蓋謂春秋藏於史官人所不知而又典禮非舊自經夫子之手則典禮著明是非各得其所學者傳之於是天下亂臣賊子皆知所懼後之有國者有所據以為賞罰作史者有所守以為是非姦雄者有所懼而不敢肆遂與禹抑洪水周公兼夷狄驅猛獸同功聖人功化之妙自如此爾自漢以來言春秋者一事一字而曲為之說則又鑿矣

齊陳恒與闕止爭政殺之執簡公寘于舒州

左氏曰齊簡公之在魯也闕止有寵焉及即位使為政  
陳成子憚之諸御鞅言於公曰陳闕不可竝也弗聽子  
我夕陳逆殺人逢之執以入陳氏方睦使疾而遺之酒  
肉醉守者殺之而逃陳豹為子我臣與之言政說謂之  
曰我盡逐陳氏而立女對曰我遠於陳氏矣且違者不  
過數人何盡逐焉遂告陳氏子行曰陳逆彼得君弗先必  
禍子子行舍於公宮成子兄弟四乘如公子我在幄出  
逆之遂入閉門侍人禦之子行殺侍人公與婦人飲酒

于檀臺成子遷諸寢公將擊之子餘曰非不利也將除害也成子出舍於庫聞公猶怒將出子行抽劍乃止子我歸屬徒攻闔與大門皆不勝乃出陳氏追之豐丘人執之以告殺諸郭闕執公于舒州公曰吾早從鞅之言不及此

五月庚申朔日有食之

宋向魋謀弑其君不克入于曹以叛自曹出奔衛向巢奔魯司馬牛致其邑而適齊

左氏曰宋桓魋之寵害於公公將討之未及魋先謀公  
公知之告皇野曰魋將禍余請即救司馬子仲以君命  
召左師魋之兄至告之故對曰魋之不共宋之禍也敢

向巢也

不唯命是聽請瑞馬以命其徒攻桓氏魋欲入子車止  
之曰不能事君而又伐國民不與也祇取死焉魋遂入  
于曹以叛使左師巢伐之亦入于曹向魋奔衛公文氏  
攻之奔齊向巢奔魯宋公使止之巢辭曰臣之罪大盡  
滅桓氏可也若以先臣之故而使有後君之惠也若臣

則不可以入矣○論語曰司馬牛憂曰人皆有兄弟我獨亡子夏曰商聞之矣死生有命富貴在天君子敬而無失與人恭而有禮四海之內皆兄弟也君子何患乎無兄弟也

集註曰牛之兄向魍作亂牛憂其為亂而將死也

○左氏曰司馬牛

致其邑與珪而適齊向魍出於衛而奔齊陳成子使魍為卿司馬牛又致其邑馬而適吳吳人惡之而反趙簡子召之陳成子亦召之卒於魯郭門之外阮氏葬諸丘

輿

杜氏曰錄其卒葬所在愍賢者失所

履祥按向魑之亂司馬牛常以為憂夫子知之有內省不疚之訓矣而又直以無兄弟為憂子夏廣之胡氏病其意圓而語滯夫以牛之高節人所招致史所愛愍然何以在宋留巢而不留牛適吳又何至為吳人所惡豈吳人所尚異與不然則牛之所以敬而無失恭而有禮者亦容有所未至邪此亦牛之尚有疚子夏之言或切中其病也

齊陳恒弑其君簡公于舒州立其弟驚

是為平公孔

子請魯侯討之三家不可

論語曰陳成子弑簡公孔子沐浴而朝告於哀公曰陳恒弑其君請討之公曰告夫三子孔子曰以吾從大夫

之後不敢不告也君曰告夫三子者之三子告不可孔  
子曰以吾從大夫之後不敢不告也○程子曰左氏記  
孔子之言曰陳恒弑其君民之不予者半以魯之衆加  
齊之半可克也此非孔子之言誠若此言是以力不以  
義也若孔子之志必將正名其罪上告天子下告方伯  
而率與國以討之至於所以勝齊者孔子之餘事也豈  
計魯人之衆寡哉當是時天下之亂極矣因是足以正  
之周室其復興乎魯之君臣終不從之可勝惜哉



履祥按弑君之賊人得討之孔子告老久矣而兩言從大夫之後則見音見大夫當何如也不敢不告猶湯曰予畏上帝不敢不正蓋理不可泯而聖人職分不可不舉然兩曰以吾從大夫之後夫子蓋以自任也魯為齊弱其來固久使魯之君臣授之以兵而委其責於夫子則夫子固有處矣惜也夫子暮年有此一事又不得為而天下迄不得蒙聖人之力後世卒不見聖人有為之略深可歎哉

### 魯饑

論語曰哀公問於有若曰年饑用不足如之何有若對曰盍徹乎曰二吾猶不足如之何其徹也對曰百姓足君孰與不足百姓不足君孰與足

履祥按哀公之問年饑謂歲凶而百姓饑餒也用不足謂賦少而國用缺乏也年饑不可加賦而用不足又不可不加賦有若對曰盍徹乎蓋且對年饑一句先以寬民力為重也及哀公有二吾猶不足之言則是因盍徹之對而專憂國用之不足故有子之意謂國家以民力為本民足則君自可與之俱足若民力不足君雖欲獨足其誰與守之則是有國者當以民力為重而已

四十年齊高無平出奔北燕

東萊呂氏大事記解題曰國高天子之貳守也田恒作亂故無平出奔元王五年犂丘之役無平復見于傳蓋田氏尋復之也史記年表是年書齊自是稱田氏謂諸

侯不復知有齊也自陳敬仲奔齊以陳字為田氏應劭  
曰田始食邑也

鄭伯伐宋

晉趙鞅帥師伐衛

呂氏曰晉趙鞅嘗納蒯瞶于戚此師其為蒯瞶而舉與  
齊及魯平子服回如齊端木賜為介齊歸魯侵  
地

左氏曰孟懿子卒成人奔喪弗內袒免哭于衢聽共弗

許成叛于齊武伯伐成不克齊陳瓘如楚過衛仲由見之曰天或者以陳氏為斧斤既斲喪公室而他人有之不可知也其使終饗之亦不可知也若善魯以待時不可乎子玉曰吾受命矣子使告我弟冬及齊平子服景伯如齊子贛為介陳成子館客曰寡君使恒告曰寡人願事君如事衛君景伯揖子贛而進之對曰寡君之願也昔晉人伐衛齊為衛故伐晉因與衛地自濟以西襍媚杏以南書社五百吳人加敝邑以亂齊因其病取

謹與聞寡君是以寒心若得視衛君之事君也則固願也乃歸成

熒惑守心

史記曰宋景公三十七年熒惑守心心宋之分野也景公憂之司星子韋曰可移於相公曰相吾之股肱曰可移於民公曰君者待民曰可移於歲公曰歲饑民困吾誰為君子韋曰天高聽卑君有君人之言三熒惑宜有動於是候之果徙三度

四十有一年衛世子蒯聵自戚入于衛

是為其莊公

子輒出奔魯衛侯使鄆肸來告

左氏曰衛孔圉取太子蒯聵之姊生慄孔氏之豎渾良夫長而美孔文子卒通於內太子在戚孔姬使之焉太子與之言曰苟使我入獲國服冕乘軒三死無與與之盟為請於伯姬良夫與太子入舍於孔氏之外圃昏二人蒙衣而乘寺人羅御孔氏之老嬖寧問之稱姻妾以告遂入適伯姬氏既食孔伯姬杖戈而先太子與五人

介與玃從之迫孔悝於厠強盟之遂劫以登臺樂寧使告季子季子將入遇子羔將出曰門已閉矣季子曰吾姑至焉子羔曰弗及不踐其難季子曰食焉不辟其難子羔遂出子路入及門公孫敢門焉曰無入為也季子曰求利焉而逃其難由不然利其祿必救其患有使者出乃入曰太子焉用孔悝雖殺之必或繼之且曰太子無勇若燔臺半必舍孔叔太子聞之懼下石乞孟黶敵子路以戈擊之斷纓子路曰君子死冠不免結纓而死

孔子聞衛亂曰柴也其來由也死矣孔悝立莊公召獲  
奉輒奔魯瞞成褚師比出奔宋衛侯使鄆武子告于周  
曰蒯瞶得罪于君父君母逋竄于晉晉以王室之故不  
棄兄弟寘諸河上天誘其衷獲嗣守封焉使下臣肸敢  
告執事王使單平公對曰肸以嘉命來告余一人往謂  
叔父余嘉乃成世復爾祿次敬之哉方天之休弗敬弗  
休悔其可追衛侯飲孔悝酒於平陽而行出奔宋

孔子卒于魯



左氏曰夏四月己丑孔丘卒公誄之曰旻天不弔不憖

遺一老俾屏余一人以在位煢煢余在疚嗚呼哀哉尼

父無自律子贛曰君其不沒於魯乎夫子之言曰禮失

則昏名失則愆失志為昏失所為愆生不能用死而誄

之非禮也稱一人非名也君兩失之

杜氏曰四月十八日乙丑無己丑已

丑五月十二日日月必有誤魯襄公二十二年生至今七十三也

○禮記曰孔子蚤作

負手曳杖消搖於門歌曰泰山其頽乎梁木其壞乎哲人其萎乎既歌而入當戶而坐子貢聞之曰泰山其頽

則吾將安仰梁木其壞哲人其萎則吾將安放夫子殆將病也遂趨而入夫子曰賜爾來何遲也夏后氏殯於東階之上則猶在阼也殷人殯於兩楹之間則與賓主夾之也周人殯於西階之上則猶賓之也而丘也殷人也予疇昔之夜夢坐奠於兩楹之間夫明王不興而天下其孰能宗予予殆將死也蓋寢疾七日而沒○孟子曰昔者孔子沒三年之外門人治任將歸入揖於子貢相嚮而哭皆失聲然後歸子貢反築室於場獨居三年

然後歸他日子夏子張子游以有若似聖人欲以所事孔子事之強魯子魯子曰不可江漢以濯之秋陽以暴之皜皜乎不可尚已○史記曰孔子葬魯城北泗上弟子及魯人往從冢而家者百有餘室因命曰孔里魯世世相傳以歲時奉祠孔子冢而諸儒亦講禮鄉飲大射於孔子冢故所居堂弟子後世因廟藏孔子衣冠琴車書○皇覽曰冢去城一里塋百畝冢南北十步東西十步高一丈二尺前以頷髀為祠壇方六尺與地平塋

樹以百數皆異種傳言弟子異國人各持其方樹來種  
柞粉維籬安貴五味兔檀之木不生荆棘刺人之草

楚公孫勝殺令尹公子申司馬公子結執楚子  
寘于高府陳人侵楚沈諸梁率方城外人討勝  
誅之迎楚子復位

左氏曰楚太子建之遇讒也奔宋又奔鄭鄭人甚善之  
又適晉與晉人謀襲鄭乃求復焉鄭人復之如初晉人  
使諜於子木

建也

請行而期焉鄭人省之得晉諜焉遂殺

子木其子曰勝在吳子西欲召之葉公曰吾聞勝也詐而亂無乃害乎子西曰吾聞勝也信而勇不為不利舍諸邊竟使衛藩焉葉公曰周仁之謂信率義之謂勇吾聞勝也好復言而求死士殆有私乎復言非信也期死非勇也子必悔之弗從召之使處吳竟為白公請伐鄭子西曰楚未節也不然吾不忘也他日又請許之未起師晉人伐鄭楚救之與之盟勝怒曰鄭人在此讎不遠矣自厲劒子期之子平見之曰王孫何自厲也曰勝以

直聞不告女庸為直乎將以殺爾父平以告子西子西  
曰勝如卵余翼而長之楚國第我死令尹司馬非勝而  
誰勝聞之曰令尹之狂也得死乃非我子西不悛吳人  
伐慎白公敗之請以戰備獻許之遂作亂殺子西子期  
于朝而劫楚子子西以袂掩面而死石乞曰焚庫弑王  
不然不濟白公曰不可弑王不祥焚庫無聚將何以守  
乞曰有楚國而治其民以敬事神可以得祥且有聚矣  
弗從葉公在蔡方城之外皆曰可以入矣子高曰以險

徼幸者其求無饜偏重必離聞其殺齊管修也而後入  
白公欲以子閭為王不可刼以兵子閭曰王孫若安靖  
楚國匡正王室而後庇焉啓之願也敢不聽從若將專  
利以傾王室不顧楚國有死不能遂殺之而以楚子如  
高府石乞尹門圉公陽穴宮負楚子以如昭夫人之宮  
葉公亦至及北門或遇之曰君胡不胄國人望君如望  
慈父母焉盜賊之矢若傷君是絕民望也若之何不胄  
乃胄而進又遇一人曰君胡胄國人望君如望歲焉日

月以幾若見君面是得艾也其亦夫有奮心猶將旌君  
以徇於國而又掩面以絕民望乃免胄而進遇箴尹固  
帥其屬將與白公子高曰棄德從賊其可保乎乃從葉  
公使與國人以攻白公白公奔山而縊其徒微之生拘  
石乞而問白公之死對曰余知其死所而長者使余勿  
言曰不言將烹乞曰事克則卿不克則烹固其所也乃  
烹石乞沈諸梁兼二事國寧乃使寧為令尹子西使寬  
為司馬子期而老於葉



衛侯逐太叔遺遺奔晉

左氏曰衛侯占夢嬖人求酒於太叔僖子不得與卜人比而告公曰君有大臣在西南隅弗去懼害乃逐太叔遺遺奔晉

四十有二年越子伐吳敗之于笠澤

國語曰越子句踐即位三年興師伐吳戰于五湖不勝棲於會稽用范蠡計令大夫種行成於吳曰請士女女於士大夫女女於大夫隨之以國家之重器吳人不許

大夫種來而復往曰請委管籥屬國家以身隨之君王  
制之吳人許諾越子曰蠡為我守於國對曰四封之內  
百姓之事蠡不如種也四封之外敵國之制立斷之事  
種不如蠡也越子曰諾令大夫種守於國與范蠡入宦  
於吳三年而吳人遣之句踐之地南至于句無北至于  
禦兒東至于鄞西至于姑蔑廣運百里乃致其父母昆  
弟而誓之曰寡人聞古之賢君四方之民歸之若水之  
歸下也今寡人不能將帥二三子夫婦以蕃命壯者無

取老婦老者無取壯妻女子十七不嫁其父母有罪丈夫二十不取其父母有罪將免者以告公醫守之生丈夫二壺酒一犬生女子二壺酒一豚生三人公與之母生二人公與之餼當室者死三年釋其政支子死三月釋其政必哭泣葬埋之如子令孤子寡婦貧病者納官其子其達士潔其居美其服飽其食而摩厲之於義四方之士來者廟禮之句踐載稻與脂於舟以行國之孺子之游者無不饋也無不歡也必問其名非其身之所

種則不食非其夫人之所織則不衣十年不收於國民  
居有三年之食吳子夫差還自黃池息民不戒越大夫  
種曰吾謂吳王將遂涉吾地今罷師而不戒以忘我我  
不可以怠今吳民既罷而大荒荐饑市無赤米而困鹿  
空虛其民必移就蒲贏於東海之濱王若今起師以會  
奪之利無使失悛夫吳之邊鄙遠者罷而未至吳王將  
耻不戰必不須至之會也而以中國之師與我戰我遂  
踐其地其至者亦將不能之會也已吾用禦兒臨之吳

王若愠而又戰幸遂可出若不戰而結成王安厚取名而去之越子曰善乃大戒師伐吳吳子起師軍于江北越子軍于江南越子乃中分其師以為左右軍以其私卒君子六千人為中軍明日將舟戰於江及昏乃令左軍銜枚泝江五里以須亦令右軍銜枚踰江五里以須夜中乃命左軍右軍涉江鳴鼓中水以須吳師聞之大駭曰越人分為二師將以夾攻我師乃不待旦亦中分其師將以禦越越子乃令其中軍銜枚潛涉不鼓不譟

以襲攻之吳師大北越之左軍右軍乃遂涉而從之又

大敗於沒

呂氏曰國語載此戰與圍吳相接按左傳後四年越乃圍吳以大夫種始謀考之必姑結

成而退至於再舉始圍吳也

晉趙鞅圍衛齊國觀陳瓘救衛晉師還

左氏曰趙鞅使告于衛曰君之在晉也志父為主請君若太子來以免志父不然寡君其曰志父之為也衛侯辭以難太子又使極之鞅圍衛齊國觀陳瓘救衛得晉人之致師者子玉使服而見之曰國子實執齊柄而命

瓘曰無辟晉師子又何辱簡子曰我卜伐衛未卜與齊戰乃還

楚滅陳殺陳湣公

左氏曰楚白公之亂陳人恃其聚而侵楚楚既寧將取

陳麥卜之武城尹

子西子公孫朝也

吉使帥帥取陳麥陳人御

之敗遂圍陳秋滅陳○史記曰楚惠復國以兵北伐殺

陳湣公遂滅陳而有之舜之德可謂至矣禪位於夏而後世血食者歷三代及楚滅陳而田常得政於齊卒為

建國

晉趙鞅復伐衛衛人出其君蒯聵而與晉平晉  
立公孫般師莊公死于戍州己氏

左氏曰衛侯謂渾良夫曰吾繼先君而不得其器若之  
何良夫代執火者而言曰疾與亡君皆君之子也召之  
而擇材焉可也若不材器可得也豎告太子太子使五  
人輿殽劫公而強盟之且請殺良夫公曰其盟免三死  
曰請三之後有罪殺之公曰諾哉衛侯為虎幄於藉圃



求令名者而與之始食焉太子請使良夫良夫乘衷甸  
兩牡紫衣狐裘至袒裘不釋劍而食太子使牽以退數  
之以三罪而殺之衛侯夢于北宮見人登昆吾之觀被  
髮北面而譟曰登此昆吾之虛縣縣生之瓜余為渾良  
夫咄天無辜衛侯貞卜其繇曰如魚窺尾衡流而方羊  
裔焉大國滅之將亡闔門塞竇乃自後踰冬晉復伐衛  
入其郛將入城簡子曰止叔向有言曰怙亂滅國者無  
後衛人出莊公而與晉平晉立襄公之孫般師而還十

一月衛侯自鄆入般師出初公登城以望見戎州問之以告公曰我姬姓也何戎之有焉翦之公使匠久欲逐石圃未及石圃因匠氏攻公公闔門而請弗許踰于北方而隊折股戎州人攻之太子疾公子青踰從公戎州人殺之公入于戎州已氏初公自城上見已氏之妻髮美使髡之以為呂姜髡既入焉而示之璧曰活我吾與女璧已氏曰殺女璧其焉往遂殺之衛人復公孫般師而立之

齊人伐衛立公子起執般師而歸

齊侯魯侯盟于蒙

左氏曰公會齊侯盟于蒙孟武伯相齊侯稽首公拜齊人怒武伯曰非天子寡君無所稽首

甲子四十有三年衛石圃逐其君起起奔齊衛出公輒自齊復歸逐石圃復石魋與太叔遺

齊陳恒殺鮑氏晏氏及公族之強者割齊安平以東至瑯琊為封邑

史記曰田常既殺簡公懼諸侯共誅已乃盡歸魯衛侵地西約晉韓魏趙氏南通吳越之使脩功行賞親於百姓以故齊復定田常言於齊平公曰德施人之所欲君其行之刑罰人之所惡臣請行之行之五年齊國之政皆歸田常田常於是盡殺鮑晏及公族之强者而割齊自安平以東至瑯琊自為封邑大於平公之所食

秦悼公卒子嗣

是為厲共公

四十有四年越人侵楚楚公子慶公孫寬追越

師不及

左氏曰越以誤吳也

楚沈諸梁伐東夷三夷男女及楚師盟于敖

呂氏曰報越之侵也三夷越之屬也

王崩太子仁踐位

吳伐楚

呂氏曰為越所驕也楚世家書吳夫差彊陵齊晉來伐楚

魯叔青來京師

丙寅元王元年齊人魯人鄭人會于廩丘

左氏曰齊人來徵會夏會于廩丘為鄭故謀伐晉鄭人辭諸侯秋師還○杜氏曰晉公室卑

吳子殺公子慶忌

左氏曰吳公子慶忌驟諫吳子曰不改必亡弗聽出居于艾遂適楚聞越將伐吳請歸平越遂歸欲除不忠者以說于越吳人殺之○呂氏曰慶忌以勇聞於諸侯世之言慶忌者多異當以左氏為正

# 越圍吳

國語曰越子伐吳吳人出挑戰一日五反越子欲許之  
范蠡曰古之善用兵者贏縮以為常四時以為紀無過  
天極究數而止天道皇皇日月以為常明者以為法微  
者則是行陽至而陰陰至而陽日困而還月盈而匡古  
之善用兵者因天地之常與之俱行後則用陰先則用  
陽後無陰蔽先無陽察用人無藝往從其所剛彊以禦  
陽節不盡不死其野彼來從我固守勿與若將與之必

因天地之災又觀其民之饑飽勞逸以參之盡其陽節

盈吾陰節而奪之利宜為人客剛彊而力疾陽節不盡

輕而不可取宜為人主安徐而重固陰節不盡柔而不

可迫凡陳之道設右以為牝益左以為牡蚤晏無失必

順天道周旋無究今其來也剛彊而力疾王姑待之越

子曰諾弗與戰居軍三年吳師自潰○呂氏曰越語下

篇所載范蠡之詞多與管子勢篇相出入

在管子  
十五卷辭氣

奇峻不類春秋時語意者戰國之初為管仲范蠡之學



者潤色之然圍之三年以待其衰必蠱之謀也

晉定公卒子錯嗣

是為出公

晉趙簡子卒立其次子無恤

襄子○按世家趙武生景叔景叔生

簡子鞅鞅生無恤

司馬公通鑑曰趙簡子之子長曰伯魯幼曰無恤將置後不知所立乃書訓戒之辭於二簡以授二子曰謹識之三年而問之伯魯不能舉其辭求其簡已失之矣問無恤誦其辭甚習求其簡出諸袖中而奏之於是簡子

以無恤為賢立以為後

以無恤為後在敬王二十年

簡子使尹鐸為

晉陽請曰以為繭絲乎抑為保障乎簡子曰保障哉尹

鐸損其戶數簡子謂無恤曰晉國有難而無以尹鐸為

少無以晉陽為遠必以為歸

國語載此事在鐵之戰前則在敬王二十七年之前

也

蜀聘于秦

呂氏曰蜀見於牧誓地與秦接秦記書蜀人來賂賂即聘也聘必有幣秦之俗不能盡行聘禮故其國史凡聘

皆謂之賂

晉荀瑶伐鄭取九邑

呂氏曰荀瑶智伯也○通鑑曰初智宣子將以瑶為後  
智果曰不如宵也瑶之賢於人者五其不逮者一也美  
鬚長大則賢射御足力則賢技藝畢給則賢巧文辯慧  
則賢彊毅果敢則賢如是而甚不仁夫以其五賢陵人  
而以不仁行之其誰能待之若果立瑶也智宗必滅弗  
聽智果別族於太史為輔氏

此事在前今以荀瑶  
初見於史故原其始

二年晉趙無恤使楚隆如吳

大事記在元王元年按史記世家在

襄子元年則元王之二年也

左氏曰越圍吳趙孟降於喪食楚隆曰三年之喪親暱之極也主又降之無乃有故乎趙孟曰黃池之役先主與吳王有質曰好惡同之今越圍吳嗣子不廢舊業而敵之非晉之所能及也吾是以為降楚隆曰若使吳知之若何趙孟曰可乎隆曰請嘗之乃往先造于越軍曰吳犯間上國多矣聞君親討焉諸夏之人莫不欣喜請

入視之許之告于吳子曰寡君之老無恤使陪臣隆敢  
展謝其不共黃池之役君之先臣志父得承齊盟曰好  
惡同之今君在難無恤不敢憚勞非晉國之所能及也  
使陪臣敢展布之吳子拜稽首曰寡人不佞不能事越  
以為大夫憂拜命之辱句踐將生憂寡人寡人死之不  
得矣又曰溺人必笑吾將有問也史黯何以得為君子  
對曰黯也進不見惡退無謗言曰宜哉

晉趙無恤滅代

史記曰襄子姊前為代王夫人簡子既葬未除服北登

夏屋

夏屋山在今代州鴈門縣東北三十里與句注山相接乃北方之險

請代王使厨

人操銅料以食代王及從者行斟陰令宰人各以料擊

殺代王及從官遂興兵平代地其姊聞之泣而呼天摩

笄自殺代人憐之所死地名之為摩笄之山

山在今蔚州飛狐縣

東北百五十里魏土地記所載死事甚詳與此不同見史記正義

遂以代封伯魯子周

為代成君伯魯者襄子兄故太子太子蚤死故封其子

○呂氏曰代北狄之別也世家曰翟犬代之先也其國

在今蔚州襄子聞新稚狗之勝

見國語

而能戒念伯魯之

廢而傳國於其子可謂有君子之資矣至於夏屋之役  
行如虎狼獨何歟蓋生於兼并無親之國而承簡子貪  
暴之規模遂以為臨大利決大計非用仁義之所也悠  
悠千載同陷一見豈不哀哉

履祥按代今蔚代二州之地也夫結吳固簡子之盟  
而考之世家則取代亦簡子之志也簡子託之夢帝  
以賜代託之寶符而示無恤以取代為是立無恤也  
無恤居喪念簡子之志為吳之圍而降食為代之利  
而詐擊之可謂能成父之志矣然救吳善也而以力  
不及辭之滅代惡也則盡心力而為焉成其惡而不

成其善是安得  
為繼志之孝乎

越人聘于魯又聘于齊

左氏曰越人始來杜氏曰越既勝吳欲霸中國始遣使  
適魯○史記年表齊平公七年越人始來

齊侯魯侯邾子盟于顧

左氏曰齊人責稽首因歌之曰魯人之臯數年不覺使

我高蹈

臯與  
蹈叶

唯其儒書以為二國憂

書與  
憂叶

是行也公先

至于陽穀



三年越人納邾子益於邾太子革奔越

左氏曰邾隱公自齊奔越曰吳為無道執父立子越人歸之太子革奔越

越滅吳吳子夫差自殺

國語曰越師遂入吳國夫差帥其賢良與其重祿以上姑蘇越圍王臺夫差懼使王孫雄行成於越曰昔不穀先委制於越君君告孤請成男女服從孤無柰越之先君何畏天之不祥不敢絕祀許君成以至于今今孤不

道得罪於君王君王以親辱於敝邑孤敢請成男女服  
為臣御句踐弗忍將許之范蠡進諫曰聖人之功時為  
之庸得時弗成天有還形天節不遠五年復反小凶則  
近大凶則遠伐柯者其則不遠今君王不斷其忘會稽  
之事乎乃不許使者往復來辭愈卑禮愈尊句踐又欲  
許之蠡曰孰使我蚤朝而晏罷者非吳乎與我爭三江  
五湖之利者非吳邪十年謀之一朝而棄之其可乎王  
姑勿許其事將易冀已句踐曰吾欲勿許而難對其使

者子其對之蠡乃左提鼓右援枹以應使者曰昔天以越賜吳而吳不受今天以吳賜越越敢不聽天之命而聽君之令乎乃不許成因使人告于夫差曰天以吳賜越孤不敢不受以民生之不長王其無死民生於地上寓也其與幾何寡人其達王於甬句東

注曰今句章東海口外洲也

夫婦三百唯王所安以沒王年夫差辭曰寡人禮先一飯君若不忘周室而為敝邑宸宇亦寡人之願也君若曰吾將殘汝社稷滅汝宗廟寡人請死吾何面目以視

於天下乎夫差將死曰使死者無知則已若其有知吾

何面目以見員也乃縊越人以歸

吳自泰伯至夫差二十五世今日本國亦

云吳泰伯之後蓋吳亡其子孫支庶入海為倭也

越子會齊晉及諸侯于徐州

世家曰句踐已平吳乃以兵北渡淮與齊晉諸侯會於

徐州

呂氏曰徐州即舒州也字从人音舒

越人致貢王賜越子胥命為伯

世家曰致貢於周周元王使人賜句踐胥命為伯○吳

越春秋曰句踐乃使使號令齊楚秦晉皆輔周室血盟而去秦不如越之命句踐乃選吳越將士西渡河以攻秦軍士苦之會秦怖懼逆自引咎越乃還軍

越子以江北地至泗上與楚以泗東地與魯歸吳所侵宋地

世家曰句踐已會渡淮而南以淮上地與楚又與魯泗東方百里歸吳所侵地於宋越兵橫行於江淮東諸侯畢賀號稱霸王○外紀曰越索卒於楚而攻晉左史倚

相謂楚子曰越已破吳豪士死銳卒盡大甲傷索兵攻  
晉示我病也不如起師與之分吳楚子曰善起師從之  
越伯怒將擊楚文種曰我憊矣與戰必不克不如賂之  
乃割露山之西五百里以與楚

履祥按左史倚相見於楚靈之末歷平昭惠而今尚  
在是及見春秋以後也舊云左氏傳丘明所作前儒  
非之謂左丘姓而明名其人於夫子年輩為先此左  
氏非左丘明也文公疑左氏乃左史之氏意楚左史  
倚相之徒為  
之其信然乎

越范蠡去越越伯殺其大夫文種

大事記曰按史記國語范蠡與句踐深謀二十餘年竟  
滅吳北渡兵於淮以臨齊晉反國蠡以為大名之下難  
以久居且句踐可與同患難與處安及至五湖辭於句  
踐曰君王勉之臣不復入越國矣句踐曰不穀疑子之  
所謂者何也對曰臣聞之為人臣者君憂臣勞君辱臣  
死昔者王辱於會稽臣所以不死者為此事也今事已  
濟矣蠡請從會稽之罰句踐曰所不掩子之惡揚子之  
美者使其身無終沒於越國子聽吾言與子分國不聽

吾言身死妻子為戮范蠡對曰臣聞命矣君行制臣行  
意遂乘輕舟以浮於五湖莫知其所終極○史記曰范  
蠡去自齊遺大夫種書曰蜚鳥盡良弓藏狡兔死走狗  
烹越王為人長頸烏喙可與共患難不可與共安樂子  
何不去種見書稱病不朝人或讒種且作亂越王乃賜  
種劍曰子教寡人伐吳七術寡人用其三而敗吳其四  
在子子為我從先王試之種自殺

四年晉荀瑶告伐齊



左氏曰晉荀瑶伐齊高無平帥師御之知伯視齊師馬駭遂驅之曰齊人知余旗其謂余畏而反也及壘而還將戰長武子請卜知伯曰君告于天子而卜之以守龜於宗祧吉矣吾又何卜焉且齊人取我英丘君命瑶非敢耀武也治英丘也以辭伐罪足矣何必卜戰于犁丘齊師敗績知伯親禽顏庚○呂氏曰知伯賢於人者五犁丘之役見其三焉馬駭驅之親禽顏庚射御足力也拒長武子之辭巧文辯慧也決戰不卜彊毅果敢也告

於天子卜之守龜春秋之末猶如此

魯叔青如越越諸鞅聘魯

蔡成侯卒子產嗣

是為聲侯

楚人聘于秦

五年晉侯及魯臧石伐齊取廩丘

左氏曰晉侯將伐齊使來乞師曰昔臧文仲以楚師伐齊取穀宣叔以晉師伐齊取汶陽寡君欲徼福於周公願乞靈於臧氏臧石帥師會之取廩丘軍吏令繕將進

萊章曰君卑政暴往歲克敵今又勝都天奉多矣又焉能進是僨言也役將班矣晉師乃還餼臧石牛大史謝之曰以寡君之在行牢禮不度敢展謝之

越人執邾子以歸立公子何

左氏曰邾子又無道越人執之以歸而立公子何何亦無道

魯侯以公子荆之母為夫人荆為太子

左氏曰公子荆之母嬖將以為夫人使宗人釁夏獻其

禮對曰無之公怒曰女為宗司立夫人國之大禮也何故無之對曰周公及武公娶於薛孝惠娶於商自桓以下娶於齊此禮也則有若以妾為夫人則固無其禮也公卒立之而以荊為太子國人始惡之

魯侯朝于越

左氏曰公如越得太子適郢

太子名也

將妻公而多與之地

公孫有山使告于季孫季孫懼使因太宰嚭而納賂焉乃止○呂氏曰嚭亡吳者也句踐不以為首誅而又寵

秩之其不終伯也宜哉

履祥按史記吳世家越滅吳誅太宰嚭以為不忠而左氏傳宰嚭復見於越為魯納賂二書必有一誤當以左氏為正句踐謂欲赦吳而范蠡卒滅之然范蠡得西施也以色而句踐之用宰嚭也以財與是又五伯之罪人也

義渠聘秦

六年衛侯輒出奔宋

左氏曰初衛人翦夏丁氏以其帑賜彭封彌子彌子飲公酒納夏戊之女嬖為夫人其弟期太叔疾之從孫甥

也少畜於公以為司徒夫人寵衰期得罪公之入也奪南氏邑奪司寇亥政使侍人納公文懿子之車于池使優狡盟拳彌而甚近信之使三匠久為靈臺于藉圃與諸大夫飲酒焉褚師聲子韞而登席公怒辭曰臣有疾異於人若見之君將設之是以不敢公愈怒大夫辭之不可褚師出公戟其手曰必斷而足聞之與公孫彌牟公文要司寇亥司徒期因三匠與拳彌以作亂使拳彌入于公宮而自太子疾之宮譟以攻公酈子士請禦之

彌援其手曰不見先君乎君何所不逞欲且君嘗在外  
矣豈必不反當今不可衆怒難犯休而易間也乃出將  
適蒲彌曰晉無信不可將適郢彌曰齊晉爭我不可將  
適泠彌曰魯不足與請適城鉏以鉤越越有君乃適城  
鉏彌曰衛盜不可知也請速自我始乃載寶以歸公為  
支離之卒因祝史揮以侵衛衛人病之懿子知之請逐  
揮曰彼好專利而妄夫見君之入也將先道焉若逐之  
必出於南門而適君所夫越新得諸侯將必請師焉揮

在朝遣諸其室乃館諸外里遂有寵使如越請師

魯侯自越反

左氏曰六月公至自越季康子孟武伯逆於五梧郭重僕見二子曰惡言多矣君請盡之公宴於五梧武伯為祝惡郭重曰何肥也季孫曰請飲毘也以魯國之密邇仇讎臣是以不獲從君克免於大行又謂重也肥公曰是食言多矣能無肥乎飲酒不樂公與大夫始有惡

七年越臯如后庸宋樂伐魯叔孫舒伐衛納衛



侯輒衛人賂之不克納衛人立黜

是為悼公

左氏曰叔孫舒帥師會越皐如后庸宋樂茂納衛侯文

子欲納之

文子彌牟

懿子曰君懷而虐少待之必毒於民乃

睦於子矣師侵外州大獲出禦之大敗掘褚師定子之

墓焚之於平莊之上文子使王孫齊私於皐如曰子將

大滅衛乎抑納君而已乎皐如曰寡君之命無他納衛

君而已文子致衆而問焉曰君以蠻夷伐國國幾亡矣

請納之衆曰勿納曰彌牟亡而有益請自北門出衆曰

勿出重賂越人申開守陴而納公公不敢入師還立悼公南氏相之以城鉏與越人公日期則為此令苟有怨於夫人者報之

衛人使司徒期聘於越

左氏曰司徒期聘於越

為悼公聘

公攻而奪之幣期告越伯

越伯命取之期以衆取之公怒殺期之甥之為太子者出公自城鉏使以弓問子贛且曰吾其入乎子贛稽首受弓對曰臣不識也私於使者曰昔成公孫於陳甯武

子孫莊子為宛濮之盟而君入獻公孫於齊子鮮子展  
為夷儀之盟而君入今君再在孫矣內不聞獻之親外  
不聞成之卿則賜不識所由入也詩曰無競惟人四方  
其順之若得其人四方以為主而國於何有遂卒于越  
履祥按有子曰本立而道生蒯賸與輒皆非孝子故  
其所以為國者顛錯妄謬事事足以取亡或謂輒初  
在國未見過舉其於孔子不失公養之禮何其再入  
之多妄也是不然惡莫大於拒父其他小事則輒年  
齒尚少聽於孔叔而孔叔又  
聽於季子所以其惡未著耳

宋景公卒大尹立啓六卿逐啓及大尹而立得

是為  
昭公

左氏曰宋景公無子取公孫周之子得與啟

元公曾孫

畜諸

公宮未有立焉於是六卿三族降聽政因大尹以達大  
尹常不告而以其欲稱君命以令國人惡之公遊於空  
澤卒于連中大尹興空澤之士千甲奉公自空桐入如  
沃宮使召六子曰君請六子畫至以甲劫之曰君有疾  
病請二三子盟乃盟于少寢之庭曰無為公室不利大  
尹立啟奉喪殯于大宮三日而後國人知之司城蔑使

宣言于國曰大尹惑蠱其君而專其利今君無疾而死  
又匿之是無他矣大尹之罪也六子在唐孟皆歸授甲  
使徇于國曰大尹惑蠱其君以陵虐公室與我者救君  
者也衆曰與之使國人施于大尹大尹奉啟以奔楚乃  
立得

王崩太子介踐位

晉荀瑶城宅陽

大事記曰水經注竹書紀年晉出公六年荀瑶城宅陽

濟瀆之旁有故宅陽城也魏冉攻魏芒卯于北宅乃此  
地屬滎陽

癸酉貞定王元年

大事記曰史記作定王介世本司馬貞索隱蘇氏古史並

作貞王皇甫謐經世稽古錄並作貞定王  
今姑從稽古錄紀年並列衆說以待知者越人

使后庸聘魯且言邾田魯侯及越后庸盟于平

陽

左氏曰越子使后庸來聘且言邾田封于駘上盟于平  
陽三子皆從康子病之言及子贛曰若在此吾不及此

夫武伯曰然何不名曰固將名之文子曰他日請念

晉荀瑶帥師伐鄭齊陳恒帥師救鄭晉師還

左氏曰晉荀瑶帥師伐鄭次于桐丘鄭駟弘請救于齊齊師將興陳成子屬孤子三日朝設乘車兩馬繫五邑

焉召顏涿聚之子晉曰隰之役而父死焉顏以國之多

庚

難未女恤也今君命女以是邑也服車而朝毋廢前勞乃救鄭及留舒違穀七里穀人不知及濮雨不涉子思

曰國參大國在敝邑之宇下是以告急今師不行恐無及

也成子衣製杖戈立於阪上馬不出者助之鞭之知伯聞之乃還曰我卜伐鄭不卜敵齊使謂成子曰大夫陳之自出陳之不祀鄭之罪也

楚滅陳此証

故寡君使瑤察陳

衷焉謂大夫其恤陳乎若利本之顛瑤何有焉成子怒曰多陵人者皆不在知伯其能久乎中行文子曰有自晉師告寅者將為輕車千乘以壓齊師之門成子曰寡君命恒曰無及寡無畏衆雖過千乘敢辟之乎將以子之命告寡君文子曰吾乃今知所以亡君子之謀也始



裹終皆舉之而後入焉今我三不知而入之不亦難乎

履祥按陳常智伯皆專國者其相遇如此學者當考其所以得失成敗之故也

### 魯侯出奔越

左氏曰季康子卒公弔焉降禮公患三桓之侈也欲以諸侯去之三桓亦患公之妄也故君臣多間公遊于陵阪遇孟武伯於孟氏之衢曰請有問於子余及死乎對曰臣無由知之三問卒辭不對公欲以越伐魯而去三桓秋公如有陘氏因孫于邾乃遂如越

魯哀公卒于有山氏魯人立其子寧

是為悼公

史記曰國人迎哀公復歸卒于有山氏子寧立是為悼公悼公之時三桓勝魯如小侯卑於三桓之家○古史曰子貢言哀公不沒於魯而史記稱哀公自越歸卒於有山氏歸於有山而不歸國事未可信也

履祥按魯昭公在外非不久魯未嘗別立君也今立其子寧則是哀公沒於外矣未及告立而沒於有山氏事容有之夫不薨於其位猶道死也雖謂之不沒於魯亦可也經世書三桓作難弑其君哀公蓋誅心之法不弑而實弑也

二年

魯悼公元今本年表在四年  
大事記辨云在二年經世同

三年晉地震

四年燕獻公卒孝公立

越莢執卒子鹿郢嗣

是為  
龜與

索隱曰紀年云晉出公十年十一月於粵子勾踐卒是  
為莢執次鹿郢立樂資云越語謂鹿郢為龜與

履祥按勾踐太子左氏作適郢紀年作鹿郢史記作  
龜與當以左氏紀年為正鹿與適語訛爾龜與必其  
號猶勾踐之號莢執也莢執越語  
如西域二合之音即華言德云

五年晉荀瑶趙無恤帥師圍鄭

左氏曰悼之四年晉荀瑶帥師圍鄭未至鄭馬弘曰知

伯懷而好勝早下之則可行也乃先保南里以待之知

伯入南里門于桔秩之門鄭人俘鄩魁壘

晉士也

賂之以

知政閉其口而死將門知伯謂趙孟入之對曰主在此

知伯曰惡而無勇何以為子對曰以能忍耻庶無害趙

宗乎知伯不悛趙襄子由是甚知伯

六年晉人楚人聘秦

鄭聲公卒子易嗣

是為哀公

晉河絕于扈

八年秦塹阿旁

秦伐大荔取其王城

大事記曰大荔戎之別種也徐廣曰今之臨晉也按匈奴傳岐梁山涇漆之北有義渠大荔烏氏朐衍之戎外紀曰是時義渠大荔最強築城數十皆自稱王

十年越鹿郢卒子不壽嗣

是為盲姑

十有一年晉荀瑶與趙氏韓氏魏氏分范中行氏之地以為已邑晉侯告于齊魯請伐四卿四卿反攻其君晉侯奔齊

晉荀瑶滅夙繇

大事記曰夙繇狄國也

戰國策作公由

知伯欲攻夙繇而無道

鑄大鐘方車二軌以遺之夙繇之君斬岸堙谿以迎鐘赤章蔓枝諫曰知伯貪而無信欲攻我而無道今師必隨之君曰大國為懼而子逆之不祥赤章蔓枝曰為人

臣不忠貞罪也忠貞不用遠身可也斷轂而行至齊七月而夙繇亡外紀載於此年今從之

十有二年晉出公卒于齊荀瑶立昭公曾孫驕

是為哀公而專其政

史記曰知伯與趙韓魏共分范中行地以為邑出公怒告齊魯欲以伐四卿四卿恐遂反攻出公出公奔齊道死故知伯乃立昭公曾孫驕為晉君是為哀公

趙世家作懿公

紀年作敬公

哀公大父雍晉昭公少子也號戴子戴子生忌

忌善知伯早死知伯欲盡并晉未敢乃立忌子驕為君  
當是時晉國政皆決知伯晉哀公不得有所制知伯遂  
有范中行地最彊

蔡聲侯卒子嗣

是為元侯

晉荀瑶襲衛還三卿宴於藍臺

戰國策曰知伯欲伐衛遺衛君野馬四百白璧一羣臣  
皆賀南文子有憂色曰此小國之禮而大國致之君其  
圖之衛君以其言告邊境知伯果起兵襲衛至境而反



曰衛有賢人先知吾謀也已而又欲襲衛亡其太子使  
奔衛南文子曰太子顏甚有寵亡必有故使人迎之於  
境曰車過五乘慎勿納知伯乃止

南文子公孫彌牟也

○國語曰

還自衛三卿宴于藍臺知襄子戲韓康子而侮段規知  
國聞之諫曰主不備難必至矣曰難將由我我不為難  
誰敢興之對曰卻氏有車轅之難趙有孟姬之讒欒有  
叔祁之愬范中行有函冶之難皆主之所知也夏書曰  
一人三失怨豈在明不見是圖周書曰怨不在大亦不

在小君子能勤小物故無大患今主一宴而耻人之君  
相又弗備曰不敢興難夫誰不可喜而誰不可懼蝸蟻  
蝨蠆皆能害人况君相乎弗聽自是五年乃有晉陽之  
難段規反首難而殺知伯于師

晉河水赤三日

秦伯帥師與繇諸戰

十有三年晉取秦武城

史記秦紀曰晉取武城

正義曰武城在  
華州鄭縣東北

齊平公卒子積嗣

是為宣公

陳成子卒子盤代

世家自陳完至成子恒七世

大事記曰成子陳恒也春秋謂之陳史記謂之田蓋自春秋後遂稱田氏也盤相齊宣公宣公名年表作就田盤世本作班

履祥按陳故國田齊之封邑陳未滅之前田氏猶稱陳陳既滅之後田氏遂稱田一國不再興其意蓋削故國之號而圖齊也荀瑶之譏正中其腹心之疾故成子無辭以對而言他

十有四年晉荀瑶大治宮室

國語曰知襄子為室美士茁夕焉知伯曰室美矣對曰美則美矣抑臣亦有懼也知伯曰何懼對曰臣以秉筆事君志有之曰高山峻原不生草木松柏之地其土不肥今土木勝臣懼其不安人也室成三年而知氏亡

晉荀瑶約魏駒韓虎攻趙無恤無恤奔晉陽

經世

係此  
年

通鑑曰知伯請地於韓康子康子欲弗與段規曰知伯好利而懷不與將伐我不如與之彼狃於得地必請於

他人他人不與必嚮之以兵然則我得免於患而待事  
之變矣康子曰善乃與之知伯悅又求地於魏桓子桓  
子欲弗與任章問焉桓子曰無故任章曰無故索地諸  
大夫必懼吾與之地知伯必驕彼驕而輕敵此懼而相  
親以相親之兵待輕敵之人知氏之命必不長矣不如  
與之以驕知伯然後可以擇交而圖之柰何獨以吾為  
知氏質乎桓子曰善亦與之知伯又求蔡皋狼之地於  
趙襄子襄子弗與知伯怒帥韓魏之甲以攻之襄子將

出曰吾何走乎從者曰長子近且城厚完襄子曰民罷力以完之又斃死以守之其誰與我從者曰邯鄲之倉庫實襄子曰浚民之膏澤以實之又因而殺之其誰與我其晉陽乎先主之所屬也尹鐸之所寬也民必和矣乃走晉陽

此下通鑑雜取國語史記戰國策而文不同今一以通鑑文公所節為正

鄭人弑哀公而立聲公之弟丑

是為共公

十有五年晉荀瑶及韓魏圍晉陽

通鑑曰三家圍而灌之城不浸者三板沈竈產鼃民無

# 叛意

十有六年晉趙無恤約魏駒韓虎攻荀瑶滅之  
三分其地

通鑑曰知伯行水魏桓子御韓康子驂乘知伯曰吾乃  
今知水可以亡人國也桓子肘康子康子履桓子之跗  
以汾水可以灌安邑絳水可以灌平陽也絺疵謂知伯  
曰韓魏必反矣知伯曰子何以知之對曰以人事知之  
夫從韓魏而攻趙趙亡難必及韓魏矣今約勝趙而三

分其地城降有日而二子無喜志有憂色是非反而何  
明日知伯以其言告二子二子曰此讒臣欲為趙氏游  
說使主疑二家而懈於攻趙也不然二家豈不利朝夕  
分趙氏之田而欲為此危難不可成之事乎二子出絺  
疵入曰主何以臣之言告二子也知伯曰子何以知之  
對曰臣見其視臣端而趨疾知臣得其情故也知伯不  
悅趙襄子使張孟談潛出見二子曰臣聞晉亡則齒寒  
趙亡則韓魏為之次矣二子乃陰與約為之期日而遣



之襄子夜使人殺守隄之吏而決水灌知伯軍知伯軍  
亂韓魏翼而擊之襄子將卒犯其前大敗其衆遂殺知  
伯滅其族而分其地唯輔果在

殺知伯於  
鑿臺之上

○左氏曰趙

襄子甚知伯遂喪之知伯貪而懷故韓魏反而喪之○  
通鑑曰趙襄子漆知伯之頭以為飲器知伯之臣豫讓  
欲為之報仇乃詐為刑人挾匕首入襄子宮中塗廁左  
右欲殺之襄子曰知伯死無後而此人欲為報仇真義  
士也吾謹避之耳讓又漆身為癩吞炭為啞行乞於市

其妻不識也其友識之為之泣曰以子之才臣事趙孟  
必得近幸子乃為所欲為顧不易邪何乃自苦如此讓  
曰委質為臣而求殺之是二心也吾所以為此者將以  
愧天下後世之為人臣而懷二心者也後又伏於橋下  
欲殺襄子襄子殺之

履祥按豫子之忠壯矣然猶惜其出燕丹荆軻之計  
也知伯雖滅亡無後然知開知寬尚據邑未下也以  
豫子之勇相與殊死豈不足以興復知氏哉而顧死  
於刺客之靡邪即子有言死天下之事易成天下之  
事難既能成之何憚於死乎豫子可謂能死事而已  
然往古事情又難踰度若開寬二子不能相任不足

與有為異時未必有成則  
反不若今日之死得矣

大事記曰段規謂韓康子曰分地必取成臯康子曰成  
臯石溜之地也寡人無所用之段規曰臣聞一里之厚  
而動千里之權者地利也千人之衆而破三軍者不意  
也君用臣言則韓必取鄭矣康子曰善果取成臯至韓  
之取鄭也果從成臯始趙襄子行賞高共為上晉陽之  
難唯共無功功臣皆怒襄子曰方晉陽急群臣皆懈唯  
共不敢失人臣禮是以先之張孟談既固趙宗告襄子

曰五霸之所以致天下者主勢能制臣無令臣能制主  
故貴為列侯者不令在相位自將軍以上不為近大夫  
今臣之名顯而身尊權重而衆服臣願捐功名去權勢  
以離衆襄子悵然曰何哉吾聞輔主者名顯功大者身  
尊任國者權重此先聖之所以集國家安社稷乎子何  
為然對曰臣觀成事聞往古臣主之權均能美未之有  
也君若弗圖則臣力不足愴然有決色乃納地釋事而

耕於負親之丘

大事記雜取史記戰國策  
外紀今止以大事記為正

齊田盤使其宗人盡為齊都邑大夫與三晉通  
使晉趙無恤使新稚狗伐狄

大事記曰按國語列子外紀趙襄子使新稚穆子伐狄  
勝之取左人中人遽人來告襄子方食而有憂色侍者  
曰狗之事大矣而主之色不怡何也襄子曰夫江河之  
大也不過三日飄風暴雨不終朝日中不須臾今趙氏  
之德行無所積一朝而兩城下亡其及我哉君子曰趙  
氏其昌乎夫憂者所以為昌也喜者所以為亡也勝非

其難者也持之者其難者也唯有道之主為能持勝外  
紀載於此年今從之

國語此事繼簡子之後外  
紀係此恐非然別無考

十有七年晉知開奔秦

大事記曰開荀瑶之族也荀氏自首以來或謂知氏按  
秦年表晉大夫知開率其邑人來奔

十有八年秦左庶長城南鄭

大事記曰史失其名庶長秦官見於左傳魯襄公十一  
年秦記則庶長弗忌當桓王二十二年則秦有此官久

矣秦楚自為制度不用禮故官名異於他國

衛悼公卒子弗嗣

是為敬公

蔡元侯卒子齊嗣

十有九年燕孝公卒載立

是為成公

二十年越盲姑卒子翁嗣

是為朱句

越人迎女於秦

履祥按此越子翁

立而婚於秦也

二十有一年晉知寬奔秦

大事記曰按秦年表晉大夫知伯寬率其邑人來奔知伯既滅六年而寬始率邑人奔秦或者守別邑而未下若燕將守聊城之類歟

二十有二年楚子滅蔡蔡侯齊出亡

史記自蔡仲至侯齊

二十  
四世

二十有四年楚滅杞

大事記曰杞東樓公者夏后禹之後周武王克殷封之於杞自東樓公至簡公春凡十九世楚惠王滅之○史



記曰舜之後周武王封之陳至楚惠王滅之禹之後周武王封之杞楚惠王滅之契之後為殷殷破周封其後於宋齊湣王滅之后稷之後為周秦昭王滅之臯陶之後或封英六楚穆王滅之伯夷之後至周武王復封於齊曰太公望陳氏滅之伯翳之後至周平王時為秦項羽滅之垂夔龍後不知所封右十人者皆唐虞之際名有功德臣也其五人之後皆至帝王餘乃為顯諸侯○古史論曰宋杞皆天子之事守也蓋禮樂車服在焉故

孔子曰夏禮吾能言之杞不足徵也殷禮吾能言之宋不足徵也文獻不足故也宋雖不足徵然春秋之際晉楚大國有所不知未嘗不問焉如杞遂至於遺失無足言者昔孔子學官名於郕子郕至微矣而其先王之遺文於諸侯為詳孔子之於夏禮蓋猶有考於杞歟而國無君子不能自列悲夫

楚與秦平楚東侵地至于泗

史記曰楚滅杞與秦平是時越已滅吳而不能正江淮

北楚東侵廣地至泗上

二十有五年秦伐義渠執其君以歸晉韓虎魏  
駟伐伊洛陰戎滅之

外紀曰秦伐義渠虜其君是時韓魏共滅伊洛陰戎其  
遺脫者皆西走踰汧隴自此惟義渠猶在內餘皆徙居  
於外焉

二十有六年日有食之晝晦星見

年表失其月

秦厲共公卒子嗣

是為躁公

二十有八年王崩子去疾踐位弟叔弑之少弟  
嵬殺叔而立

史記本紀曰貞定王崩子去疾立是為哀王三月弟叔  
襲殺去疾而自立是為思王立五月少弟嵬攻殺思王  
而自立

封弟揭於河南以續周公之職

是為河南桓公

大事記曰河南即郊廓周武王遷九鼎周公營以為都  
是為王城又遷殷民於洛陽下都是為成周平王東遷

定都于王城王子朝之亂其餘黨多在王城敬王畏之徙都成周至是考王以王城故地封其弟桓公焉稽古錄謂桓公為東周桓公非也平王東遷之後所謂西周者豐鎬也所謂東周者東都也威烈王之後所謂西周者河南也所謂東周者洛陽也河南桓公之時雖未有東西周之名推本而言之謂之西周桓公則可矣何以稱河南為西周自洛陽下都而視王城則在西也何以稱洛陽為東周自河南王城視下都則在東也君陳畢

公尹殷民蓋在下都之地今書皆謂之東郊則下都在王城之東明矣

秦南鄭反

大事記曰水經漢水東過南鄭縣南酈道元注者舊傳云南鄭之號始於鄭桓公桓公死於犬戎其民南奔故以南為稱即漢中郡治也按本紀秦惠王始取楚漢中置漢中郡今躁公之時已書南鄭反豈地之往來不常先嘗屬秦歟今屬興元府

辛丑考王元年

二年晉哀公卒子柳嗣

是為幽公

四年晉侯反朝于韓趙魏氏晉獨有絳曲沃

史記曰幽公之時晉畏反朝韓趙魏獨有絳曲沃餘皆

入三晉

六年夏六月雪日有食之

年表失其月

七年燕成公卒閔公立

八年彗星見

九年楚惠卒子中嗣

簡是為

衛敬公卒子糾嗣

昭公是為

衛屬于晉韓趙魏氏

世家曰是時三晉強衛如小侯屬之

十年楚滅莒

大事記曰楚世家簡元年北伐滅莒杜氏釋例曰莒國  
嬴姓少昊之後也周武王封茲輿期於莒今城陽莒縣  
是也世本自紀公以下為己姓不知誰賜之姓也十一  
世茲丕公始見春秋共公以下微弱不復見矣四世楚



減之

魯悼公卒子嘉嗣

是為元公

禮記曰悼公之喪季昭子問於孟敬子曰為君何食敬子曰食粥天下之達禮也吾三臣者之不能居公室也四方莫不聞矣勉而為瘠則吾能毋乃使人疑夫不以情居瘠者乎哉我則食食

履祥按鄭氏曰生不能盡忠死不能盡禮孔子曰喪事不敢不勉鄭氏此言譏敬子不能企而及之也敬子其初為人如此曾子所以有遠暴慢鄙倍之戒與

十有一年義渠伐秦侵至渭陽

十有二年秦躁公卒弟立

是為懷公

秦紀曰懷公從晉來享國

十有三年晉桃李冬實

十有四年晉侯魯侯會于楚丘

十有五年王崩太子午踐位

衛公子亶弑其君昭公而自立

是為懷公

西周公封其少子班於鞏以奉王是為東周

大事記曰此東西周分之始也初考王封其弟於河南  
是為河南桓公桓公卒子威公立威公卒子惠公立河  
南惠公復自封其少子於鞏以奉王號東周自河南桓  
公續周公之職而秉政三世益專所以別封少子使奉  
王者殆欲獨擅河南之地而不復奉王歟前漢地理志  
曰鞏東周所居非也東周者指威烈王所居之洛陽也  
鞏班之采邑也世本曰東周惠公名班居洛陽是班秉  
政於洛陽而采邑則在鞏安得遂指鞏為東周乎當是

時東西周雖未分治然河南惠公既號奉王者為東周亦必自號為西周矣

履祥按貞定王崩哀王立其弟思王弑哀王而立其弟考王又殺思王而立然而少弟揭在焉使揭而復迹其所為則考王殆未保也於是封之河南是分國以處之也而揭之子孫世執其政援立威烈之初又併封其少子於東以奉王為名於是東西二周分周亦猶三家之分魯矣考王固不得而制之也周室其時地不大於曹滕民不衆於邾莒而兄弟相殺以奪之又兄弟相分以處之是區區者果何樂乎為君而未取滅亡幸哉

丙辰威烈王元年晉趙襄子卒以兄伯魯之孫

浣為後

獻子

徙治中牟襄子之弟嘉逐浣而自立

於代

是為桓子

史記曰襄子北有代南并知氏彊於韓魏其後娶空同氏生五子襄子為伯魯之不立也不肯立子且必欲傳位與伯魯子代成君成君先死乃取代成君子浣立為太子襄子立三十三年卒浣立是為獻子獻子少即位

治中牟

呂氏曰汲冢竹書曰齊師伐趙東鄙園中牟史記正義曰此中牟在河北非鄭之中牟也管子

云狄滅邢衛齊築五鹿中牟鄴以衛諸夏按五鹿在魏州元城鄴即相州蕩陰縣西五十八里有牟山蓋中牟

邑在此山側也後云魏欲通平邑中牟之道亦在牟山之側也

秦庶長黽弑其君懷公國人立其孫

是為靈公

大事記曰庶長黽與大臣圍懷公懷公自殺懷公太子曰昭子蚤死大臣乃立太子昭子之子是為靈公秦記作肅靈公云居涇陽

鄭共公卒子已嗣

是為幽公

晉韓康子卒子啟章代

武子○按左傳杜氏注國語曲沃桓叔生韓萬

自萬至康子虎九世

魏桓子卒子斯代

是為文侯○世家畢公高之苗裔孫

畢萬事晉獻公賜邑于魏為大夫自萬至桓子駒八世

二年晉趙桓子卒國人殺其子迎浣復位

史記曰襄子弟桓子逐獻子自立於代一年卒國人曰桓子立非襄子意乃共殺其子而復迎立獻子

三年晉韓啟章伐鄭殺幽公鄭人立其弟駘為

緇公

四年秦作上下時

大事記曰秦靈公作上下時於吳陽上時祭黃帝下時

祭炎帝

六年盜殺晉幽公魏斯誅亂者立其子止

是為烈公

大事記曰幽公淫婦人夜竊出邑中盜殺幽公魏文侯以兵誅晉亂立幽公子止年表書魏誅晉幽公蓋有脫字皇極經世作魏文侯殺晉幽公因年表之誤也

外紀威烈

王四年晉幽公夫人秦嬴賊公於高寢

七年晉魏斯城少梁韓啟章都平陽趙浣城泣

氏



大事記曰按秦本紀靈公六年晉城少梁秦擊之年表  
靈公七年與魏戰少梁蓋出師在六年而戰在七年也  
竹書紀年晉烈公元年韓武子都平陽趙獻子城洺氏  
少梁故城在同州韓城縣南二十二里洺氏今澤州高  
平縣

八年秦人與晉魏氏戰少梁

越滅郟

大事記曰郟少皞氏之後也嬴姓國在東海郡今海州

方春秋時太皞之後猶有任宿須句顓臾四國存而少皞之祀莒郟實司之至於戰國二皞之世獨任僅見於孟子之書而已此臧文仲所以發不祀忽諸之嘆也

甲子九年晉魏氏復城少梁

秦城塹河瀕秦初以君主妻河

史記索隱曰謂初以此年取他女為君主君主猶公主也妻河謂嫁之河伯故魏俗猶為河伯取婦蓋其遺風殊異其事故云初○大事記曰以君甥妻河用諸河以

求福也魏猶沿其習俗文侯使西門豹為鄴令鄴民苦  
為河伯取婦豹始禁之正與同時魏與秦鄰意者染秦  
俗與

十年晉趙氏城平邑

水經注竹書紀年  
世家在十五年

十有一年秦補龐城城籍姑

履祥按魏城少梁而秦塹河瀕蓋相備也至是又城  
籍姑籍姑在同州韓城縣北三十五里而少梁在韓  
城縣南三十二里蓋對壘也

衛公孫頹弑其君懷公而自立

是為慎公頹  
敬公之孫也

秦靈公卒國人廢其子而立其季父

是為簡公

大事記曰簡公懷公之子而昭子之弟也秦記曰簡公從晉來享國

齊田居思伐晉趙氏鄙圍平邑

十有二年中山武公初立

大事記曰按左傳昭公十二年八月晉荀吳假道於鮮虞滅肥是冬晉復伐鮮虞杜預曰鮮虞白狄別種在中山新市縣中山名見於傳蓋始於此及定公四年晉合

諸侯於召陵謀為蔡伐楚荀寅曰諸侯方貳中山不服  
無損於楚而失中山不如辭蔡侯則中山是時勢已漸  
強能為晉之輕重矣史記趙世家是年書中山武公初  
立意者其勢益強遂建國備諸侯之制與諸夏抗歟索  
隱曰中山古鮮虞國姬姓也而徐廣曰中山武公周定  
王之孫西周桓公之子古史謂周衰已甚安能使子弟  
據中山乎其說是也或者徐廣徒聞中山姬姓遂傳會  
其世系歟

十有三年齊田白伐晉毀黃城圍陽狐

黃城在魏州冠

氏縣南十里陽狐郭在魏州元城縣東北三十二里

秦與晉戰敗于鄭下

秦敗也

晉河岸崩壅龍門至于底柱

大事記曰春秋後河患見於史傳者始於此漢待詔賈讓曰隄防之作近起戰國壅防百川各以自利齊與趙魏瀕河齊地卑下作隄去河二十五里河東抵齊隄則西泛趙魏亦為隄去河二十五里雖非其正水尚有所

遊盪時至而去則填淤肥美民耕田之或久無害稍築  
室宅遂成聚落大水時至漂沒則更起隄防以自救稍  
去其城郭排水澤而居之湛溺自其宜也戰國之時河  
水潰圯隄岸如今歲所書者蓋亦無幾至於秦漢以後  
河始為世大患賈讓之論可謂究其本末矣

履祥按河壅龍門至底柱此西河東地  
也其後東河轉而東南則河患始大

十有四年齊田白伐魯莒及安陽

大事記曰世家作伐魯莒及安陵史記正義曰後魏地

形志云已氏有安陽城今宋州楚丘西北四十里安陽故城是

晉魏斯使其子擊圍繁龐出其民

越朱勾卒子翳嗣

十有五年齊田白伐魯取一城

年表作取都

十有六年日有食之

王命晉韓啟章趙浣伐齊入長城

大事記曰按外紀王命韓趙伐齊入長城是時三晉自



通王室亦如列國特未賜命耳後漢志濟北國有長城至東海史記蘇代說燕王曰齊有長城巨防巨防即防門在平陰

魯元公卒子顯嗣

是為穆公顯世本作衍

齊田汾敗晉趙氏于平邑獲其將韓舉取平邑

齊田莊子卒子和代

是為太公

禮記曰陳莊子死赴於魯魯人欲勿哭繆公召縣子而問焉縣子曰古之大夫束脩之問不出竟雖欲哭之安

得而哭之今之大夫交政於中國雖欲勿哭焉得而弗哭且臣聞之哭有二道有愛而哭之有畏而哭之公曰然然則如之何而可縣子曰請哭諸異姓之廟於是與哭諸縣氏○大事記曰和田太公也史記索隱曰按汲冢紀年田莊子卒明年立悼子悼子卒乃次立和是莊子後有悼子蓋其年無幾所以世本及史記不得錄也履祥按禮記所載則田莊子之卒當在魯穆公立之後而大事記書在前一年今姑改書於是年而悼子之有無長短又有所不暇考也

十有七年魯侯尊禮孔伋

孟子曰繆公亟見於子思曰古千乘之國以友士何如  
子思不悅曰古之人有言曰事之云乎豈曰友之云乎  
又曰繆公之於子思也亟問亟餽鼎肉子思不悅於卒  
也標使者出諸大門之外北面稽首再拜而不受曰今  
而後知君之犬馬畜伋蓋自是臺無餽也

魯侯以公儀休為相泄柳申詳為臣

董仲舒曰公儀子相魯入其家見織帛怒而出其妻食

於舍而茹葵愠而拔其葵曰吾已食祿又奪園夫紅女利乎○孟子曰昔者魯繆公無人乎子思之側則不能安子思泄柳申詳無人乎繆公之側則不能安其身

秦初令吏帶劔

大事記曰佩玉三代也佩劔秦也秦與三代之分無他觀其所佩而已矣秦記七年又書百姓初帶劔

晉魏斯伐秦築臨晉元里

大事記曰臨晉按前漢地理志故大荔秦滅之更名臣

瓚曰舊說秦築高壘以臨晉國故曰臨晉元里失其地  
皆魏文侯伐秦所取築而守之也秦孝公所謂厲蹠簡  
公出子之不寧三晉攻奪我河西地此類是也

史記正義曰臨

晉故城在同州馮翊縣西南二里元里故城在同州澄城縣界

晉韓武子卒子虔代

是為景侯

趙獻子卒子籍代

是為

烈侯

十有八年晉魏斯擊宋使樂羊伐中山克之使

其子擊守中山

外紀曰魏文侯嘗借道於趙攻中山趙不許趙利曰魏攻中山而不能取則魏罷而趙重魏拔中山必不能越趙而守是用兵者魏而得地者趙也君不如許之彼知君利之必將輟行君不如借之道而示不得已也○大事記曰按史記戰國策韓詩外傳古史樂羊攻中山其子在中山懸之以示羊羊不顧中山烹而為之羹羊啜之盡一盃中山知其忍下之文侯賞其功而疑其心文侯愛少子摯使太子擊守中山趙倉唐傳之居三年往

來之使不通倉唐使於文侯以詩諷之文侯乃出少子  
摯封之中山而復太子摯○通鑑曰文侯伐中山克之  
以封其子摯他日問於羣臣曰我何如主皆曰仁君任  
座曰君得中山不以封君之弟而以封君之子何謂仁  
君文侯怒任座趨出次問翟璜對曰仁君也文侯曰何  
以知之對曰君仁則臣直嚮者任座之言直是以知之  
文侯悅使璜召座而反之親下堂迎之以為上客○大  
事記曰文侯子武侯之世趙世家書與中山戰于房子

是時蓋已復國其後與諸國並稱王則其勢又強矣意者若鄭莊公克許雖有其地而不絕其祀所以能復興歟索隱之說亦然

履祥按魏之攻中山也趙利已策其不能越趙而守之趙可以得地魏文侯亦豈不能察此故雖利其地以封其子亦必存中山以示趙而固子也此異時中山所以復強與

### 秦塹洛城重泉

大事記曰洛城失其地重泉屬馮翊括地志云重泉城在同州蒲城縣東南四十五里本紀書於七年

今按洛城蓋以



上洛水為名  
上維漆沮也

齊田和伐魯取成

大事記曰淳于髡曰魯穆公之時公儀子為政子柳子思為臣魯之削滋甚質諸孟子皆非是穆公亟見於子思曰古千乘之國以友士子思不悅曰古之人有言曰事之云乎豈曰友之云乎是穆公欲友子思而不可得也况敢臣之乎以臺無餽之事觀之悅賢不能舉又不能養無惑乎魯之削也穆公雖不能終用子思然尊賢

尚德之意當時所罕而公儀之廉儉亦得相小國之道以魯之弱崎嶇於強暴之間竟能與戰國相終始未必非其君相之力也

履祥按魯自三家四分公室而魯君無民久矣孔子相魯亦季氏暫授之政而尋自取之哀公既死於外而悼公之立反早於三家三十八年而至于元公元公之世齊田正熾魯於是乎失莒失安陽又失都則元公之世削已甚矣穆公立於失都之後二年而失成則田氏之烈未戢也不知公儀子之為相其時三家之勢何如公儀子諸賢所以處之者何策然自失成之後又十五年而失最而韓又來救則諸賢所以交鄰固國者必有道矣又四年而敗齊于平陸又四年而為齊所破又十年而穆公卒卒之四年而伐齊

入陽關則魯之勢其相為勝負者未為甚削也然自穆公之立以來凡百六十餘年而始亡則諸賢所與立者亦必有道矣不然則以魯之弱一日不可存況於百六十年乎

### 秦初祖禾

大事記曰秦不用周禮所謂初祖禾者變其國之舊制耳其增其損不可知也

### 晉魏斯伐秦至鄭而還築洛陰合陽

大事記曰鄭蓋長安之鄭乃桓公所始封非新鄭也史記正義曰維漆沮水也維陰城在水南合陽洽水之北

括地志云合陽故城在同州河西縣南三里雒陰在同州西

楚簡卒子當嗣

是為聲

晉韓虔伐鄭取雍丘

史記正義曰雍丘今汴州縣也古杞國

鄭城京

大事記曰備韓也括地志云京縣故城在鄭州滎陽縣東南二十里

十有九年晉魏斯受經于卜子夏友田子方敬

段干木

史記年表在此年世家在安  
王二年通鑑總在二十三年

通鑑曰魏文侯以卜子夏田子方為師每過段干木之  
廬必式四方賢士多歸之子擊出遭田子方於道下車  
伏謁子方不為禮擊怒謂子方曰富貴者驕人乎貧賤  
者驕人乎子方曰亦貧賤者驕人耳富貴者安敢驕人  
國君而驕人則失其國大夫而驕人則失其家失其國  
家者未聞有以國家待之者也夫士貧賤言不用行不

合則納履而去安往而不得貧賤哉擊乃謝之○大事  
記曰文侯受子夏經藝客段干木過其閭未嘗不軾也  
史記以田子方為文侯師說苑載翟璜謂子方曰公孫  
成進子夏而君師之進段干木而君友之進先生而君  
敬之蓋得其實○呂氏春秋曰魏文侯過段干木之閭  
而軾之其僕曰君胡為軾曰段干木賢者也未嘗肯以  
已易寡人也吾安敢不軾段干木光乎德寡人光乎地  
段干木富乎義寡人富乎財吾安敢驕之於是君請相

之段干木不肯受乃致祿百萬而時往館之國人皆喜  
居無幾何秦欲攻魏司馬唐諫曰段干木賢者也而魏  
禮之天下莫不聞無乃不可加兵乎秦君以為然乃不  
敢攻

鄭人伐晉韓氏敗韓兵取負黍

大事記曰括地志云負黍在洛州陽城西三十七里今  
屬河南府

齊侯鄭伯會于西城

齊宣公  
鄭繻公

齊田和伐衛取母丘

大事記曰母音貫即古貫國在曹州濟陰縣南五十六里

晉魏斯以吳起為西河守西門豹為鄴令上地守李悝作盡地力之教及平糴法著法經

通鑑曰吳起者衛人仕於魯齊人伐魯魯人欲以為將起取齊女魯人疑之起殺妻以求將大破齊師或譖之曰起始事曾參母死不奔喪曾參絕之又殺妻以求為



將起殘忍薄行人也起恐得罪聞魏文侯賢乃往歸之  
文侯問諸李克克曰起貪而好色然用兵司馬穰苴弗  
能過也於是文侯以為將擊秦拔五城起之為將臥不  
設席行不騎乘親褰羸糧與士卒最下者同衣食分勞  
苦卒有病疽者起為吮之卒母聞而哭之或問之對曰  
往年吳公吮其父其父戰不還踵遂死於敵吳公今又  
吮其子妾不知其死所矣是以哭之○大事記曰吳起  
事文侯為將拔秦五城乃以為西河守以拒秦李悝為

上地守

外紀載李悝事於威烈王十四年今并見於此

下令曰人有狐疑之訟

令射的中者勝不中者負令下而人皆習射及與秦人

戰大敗之文侯以鄴為憂任西門豹守鄴而河內稱治

按前漢晉志杜佑通典李悝為魏文侯作盡地力之教

以為地方百里提封九萬頃除山澤邑居三分去一為

田六百萬晦治田勤謹則晦益三斗不勤則損亦如之

地方百里之增減輒為粟百八十萬石又曰糴甚貴傷

民甚賤傷農民傷則離散農傷則國貧善平糴者必謹

觀歲有上中下孰上孰其收自四餘四百石上糴三而  
舍一中孰自三餘三百石上糴二而舍一下孰自倍餘  
百石上則糴一使民適足賈平則止小飢則發小孰之  
所歛中飢則發中孰之所歛大飢則發上孰之所歛而  
糴之又撰次諸國法著法經以為政莫急於盜賊故始  
於盜律盜賊須劾捕故著囚捕二篇其輕狡越城博戲  
借假不廉淫侈踰制以為雜律一篇終以具律具其加  
減凡六篇商君受之以相秦具律今之名例律也

二十有一年晉魏斯以魏成為相

通鑑曰文侯謂李克曰先生有言家貧思良妻國亂思良相今所置非成則璜二子何如對曰居視其所親富視其所與達視其所舉窮視其所不為貧視其所不取五者足以定之矣文侯曰先生就舍吾之相定矣李克出翟璜曰聞君召先生而卜相果誰為之克曰魏成璜忿然曰西河守吳起臣所進也君內以鄴為憂臣進西門豹君欲伐中山臣進樂羊中山已拔無使守之臣進

先生君之子無傳臣進屈侯鮒以耳目之所睹記臣何  
負於魏成克曰子之言克於君者豈將比周以求大官  
哉君問相於克克之對如是所以知君之必相魏成者  
成食祿千鍾什九在外什一在內是以東得卜子夏田  
子方段干木此三人者君皆師之子所進五人者君皆  
臣之子惡得與魏成比也璜再拜曰鄙人失對願卒為  
弟子

齊宣公卒子貸嗣

是為康公

齊田會以廩丘叛田氏

大事記曰史記世家年表皆書田會以廩丘反會非叛齊也叛田氏也

晉趙籍以公仲連為相

史記曰趙烈侯好音謂公仲連曰寡人有愛可以貴之乎連曰富之可貴之則否君曰然鄭歌者槍石二人吾賜之田人萬畝連諾而不與烈侯屢問連乃稱疾不朝番吾君謂連曰君實好善而未知所持公仲亦有進士

乎連曰未也曰牛畜荀欣徐越皆可連進之畜侍以仁  
義烈侯迥然明日欣侍以舉賢使能明日越侍以節財  
歛用察度功德所與無不充君說乃謂連曰歌者之田  
且止以畜為師欣為中尉越為內史賜連衣二襲大事記曰  
舊作相國公仲連相國非當時之官後人追書也年表  
書此事於威烈王二十四年以番吾君之言逆數公仲  
初相之歲  
當載於此

二十有二年宋昭公卒子購由嗣是為悼公

大事記曰按外紀昭公嘗出亡謂其御曰吾被服而立

侍御者數十人無不曰吾君麗也吾發言動事朝臣數百人無不曰吾君聖也内外不見吾過失是以亡也乃改操易行二年而美聞於宋宋人迎而復之

戊寅二十有三年九鼎震

履祥按九鼎三代相傳天下之形制圖籍也而震是天下之大異也司馬公通鑑始於是年而不書通鑑以人事為要也左氏終於趙韓魏之亡知伯而通鑑始於魏趙韓之為諸侯又推其始以及於趙魏韓之滅知伯又推其始以及知伯之立後舉數十年之事悉下附於二十三年之內年之不接於春秋者避續經之嫌也事之接於左氏者叙記事之實也然則呂成公大事記之年何以上接春秋曰通鑑為歷代史



法之創始於續經為有嫌大事記用史記年表之名例於春秋為不犯二意固並行而不相悖也



御批資治通鑑綱目前編卷十八

財團  
法人  
佛陀教育基金會  
釋淨空  
敬贈



總校官庶吉士臣張能照  
校對官檢討臣王鍾健  
謄錄監生臣馬嗣佺